



## **PRESS SECRETARIAT**

**MINISTRY OF THE PRIME MINISTER & CABINET**

**Apia, Samoa**

Telephone : (685) 63222 ext 746, 747, 748, (685) 24799, (685) 26397

Fax : (685) 26322 Email: [presssecretariat@samoa.ws](mailto:presssecretariat@samoa.ws)

**Press Release**

**21 Iulai 2008**

### **1. Malaga a lana Afioga Mamalu i le Ao o le Malo i Toga.**

Ua faamaonia e le Kapeneta le malaga atu o le Ao o le Malo, le Afioga Tuiatua Tupua Tamasese Efi, i se vala'aulia mai le Malo o Toga mo le faapalealiiina o lana Maiasetete, le Tupu o Toga, Siasia Tupu V, mai le Aso 30 Iulai – 2 Aokuso 2008. A mae'a lenei valaulia faapitoa, ona toe malaga lea o Lana Afioga i se faaaloalao mai le Malo o Saina mo le auai atu i Taaloga o le Olimipeka e faia i Beijing mai le Aso 8 – 22 Aokuso 2008. O lenei malaga o loo faatupeina uma mai e le Malo o Saina.

O le a malaga faatasi Lana Afioga Mamalu i le Ao o le Malo i Taaloga o le Olimipeka, ma le Minisita o Aoga, Taaloga ma Aganuu, Afioga Toomata Alapati Toese, le Ofisa Sili o le Matagaluega o le Palemia ma le Kapeneta, le Ofisa Fesoasoani Faapitoa i le Ao o le Malo, o le Leoleo Faafeao faatasi ai ma le Pu'e Ata.

### **2. Lipoti Fono i Fiti.**

Ua faamaonia e le Kapeneta le lipoti o le Fono a le Komiti Faapitoa o Minisita o Malo o le Pasefika ma le Malo Lētumau o Fiti, lea na usua i Fiti mai le Aso 15 – 16 Iulai 2008. O le usugafono a Samoa, sa Taitaimalaga ai le Afioga i le Palemia, le Susuga Tuilaepa Sailele Malielegaoi.

O Samoa o se tasi o atunuu ua tofia i totonu o se Komiti Faapitoa a le Pacific Island Forum ua ta'ua o le Ministerial Contact Group, ma e aofia ai Minisita o Vaifafu o Ausetalia, Niu Sila, Papua Niu Kini, Toga, ma Tuvalu. O le galuega a lea Komiti o le taga'i lea i tapenaga a le Malo o Fiti aua le faamoemoe o le faataunuuina o le faigapalota lautele a lea Malo ia Mati 2009.

I le feiloaiga a le Komiti Faapitoa ma le Malo o Fiti, e aofia ai le Palemia o Frank Bainimarama, o le Minisita Vaifafu, ma le loia Sili, sa faailoa mai ai lo latou manatu e faato'a faia palota lautele pe a mae'a ona faia suiga i faiga faavae ma ta'iala mo faigapalota (Electoral Reforms).

Sa toe faamamafa atu e le Komiti Faapitoa i le Malo o Fiti le latou folafolaga sa faia i le Fono a Taitai o Malo o le Pasefika lea sa faia i Vanuatu i le tausaga talu ai i le mataupu e faatatau i le latou faigapalota lautele ia Mati 2009. Sa taumafai foi le Komiti Faapitoa e faamautū mai e le Malo o Fiti le taimi tonu lea e faamoemoe e faia ai le latou faigapalota lautele. Peitai, sa le'i maua mai se tali mautū mai le Palemia o le Malo o Fiti, le Susuga Frank Bainimarama, ma ana Minisita.

Sa feiloai foi le Komiti faapitoa ma le Komisi o Palota a Fiti e saili mai ai le umi o le taimi e sauniuni atu ai mo faigapalota. Na faate'ia le Komiti Faapitoa ina ua faapea ane le Komisi o Palota a Fiti, e sefululima masina e tapena ai le faiga palota lautele pe a mae'a ona faia suiga i faiga faavae ma ta'iala mo faigapalota. Sa fesiligia e le Komiti Faapitoa le mafuaaga o le umi o le taimi e sauniuni ai mo faigapalota, a e tali ane le Taitaifono o le Komisi o Palota a Fiti, e lē lava le taimi. Sa ia faailoa mai foi le lē lava o le taimi na tapena ai le faigapalota lautele ua mae'a.

Ua I ai foi le fuafuaga mo le faatautaia e le Commonwealth ma Malo Aufaatasi o se feiloaiga I le va o itu eseese o loo feteenai nei I totonu o le Malo o Fiti ia Aukuso 2008.

Sa malaga faatasi le Afioga i le Palemia ma le Ofisa Sili o le Pulega a le Matagaluega o le Vaifafo, Afioga Aiono Mose Sua.

### **3. Lipoti Fono i Ausetalia.**

Ua faamaonia e le Kapeneta le lipoti o le auai atu o le Afioga i le Palemia, le Susuga Tuilaepa Sailele Malielegaoui, i se vala'aulia faapitoa mai le Palemia o Ausetalia lea sa faia i le Aso 4 Iulai 2008.

O le fono a le afioga i le Palemia ma le Palemia o Ausetalia sa talanoaina ai mataupu e aofia ai:

- i. Faiga Pa'aga i tulaga tau atina'e i le va o Ausetalia ma Samoa (Pacific Partnership for Development between Samoa and Australia);
- ii. Tagata faigaluega lē Tumau I Ausetalia (Australia'a Seasonal Workers Scheme);
- iii. Ofisa o Pemita mo le malaga atu I Ausetalia; ma le
- iv. Yazaki Samoa.

O isi mataupu na afea i lea fono e aofia ai le mataupu i le Malo o Fiti, ma sa toe fa'aalia ai le popole pea o le Palemia o Ausetalia i le tulaga o faigamalo fa'afitafita o lea Malo. Na saunoa foi le Afioga i le Palemia ma toe faamanatu i le Palemia o Ausetalia le folasaga a le Malo lē Tumau o Fiti i le faia lea o le latou faigapalota lautele ia Mati 2009.

A'o le'i mae'a le fono, sa faafetaia e le Palemia o Ausetalia le lagolago o Samoa i le taumafaiga a Ausetalia mo le aveva ma sui lē tumau o le UN Security Council, ma sa faaalua le lagolago malosi a Samoa i lea mataupu.

I le mae'a ai o lenei fono, sa toe fo'i ane le Afioga i le Palemia i le malaevaalele i Brisbane, ma faaauau atu ai lana malaga i Solomona.

### **4. Iugafono a le Komiti o Tauofoga.**

Ua faamaonia e le Kapeneta le fautuaga a le Komiti o Tauofoga e tuuina atu le Konekarate mo le faatautaia o le polokalame mo le aotauina o tagata faigaluega i totonu o

Matagaluega ma Faalapotopotoga a le Malo i le puleaina o atinae, i le Kamupani a le David Kay Trainig & Development Services mai Ausetalia.

Sa faasalalauina lenei tauofoga i totonu o Samoa faapea ma websites a le PSIF, le Matagaluega o le Palemia ma le Kapeneta faapea ma isi i fafo atu o Samoa. I le tapunia ai o le tauofoga, e tolu ni kamupani na tuuina mai a latou ofo. O nei kamupani e aofia ai David Kay & Development Specialists, o le Box Hii Institute of TAFE ma le Fergusson Project Management Specialists.

Sa iloiloina lenei tauofoga e se Soa Komiti, ma sa latou va'ava'ai uma i tulaga ma aiaiga o le tauofoga, aemaise le tulaga o le tomai ma le agavaa e faatino ai le galuega. O lea Soa Komiti e aofia ai le Ofisa Sili o le Matagaluega o le Palemia ma le Kapeneta, le Ofisa Sili o Pulega o le PSC, ma Ofisa Sinia o le Matagaluega o Tupe ma le SQA.

I le mae'a ai a iloilogaga o le Soa Komiti i vaega ma tulaga uma o le tauofoga, ua tofia nei le Kamupani o le David Kay & Development Specialists mai Ausetalia e faatautaia lenei polokalame.

## **5. Malaga mo Amerika Samoa.**

Ua faamaonia e le Kapeneta le malaga atu o le Vaega o Leoleo Faapitoa i Amerika Samoa e su'esu'e ai le mataupu lea na aumaia faanana ai ni aupega malolosi i totonu o le atunuu i le Aso Tofi 31 Iulai 2008.

O lenei Vaega Faapitoa na tofia e le Loia Sili a le Malo. O le faamoemoe o lenei malaga o le faatalatalanoaina lea o le alii o loo a'afia i lea mataupu, le Susuga Papalii Maroni Fitisemanu.

O lenei Vaega Faapitoa e aofia ai le tasi Sui Komesina o Leoleo, Susuga Lilomaiava Fou Taioalo, o ia foi o le ta'ita'i o le Vaega, le Loia mo le Ofisa o Tiute, Susuga Maumalo Ioane Alama, faapea ma le Susuga Viliamu Faamatuainu o le Transnational Crime Unit.

**Government Press Secretariat.**